

每週經課朗誦經文(巴克禮台語漢字)2013/12/24

共同經課 - 1

以賽亞書九章二節~七節

2 行佇黑暗中的百姓看見大光；倚起佇死蔭的地的有光照in。3 你互此個國民多多，亦加添in的歡喜；in佇你的面前歡喜，親像收割的歡喜，親像人分所搶的物彼號的快樂。4 因為伊所背重的軛，及肩頭頂的柁，以及壓制伊者的槌，你攏給伊遏折，親像佇米甸的日一樣。5 因為交戰中穿甲的人的軍裝，及翹佇血內的衫，攏欲受燒，做燃火的柴。6 因為有一個嬰仔為咱來出世；有一個子賞賜咱。伊欲負擔國政；伊的名稱做「奇妙謀士、全能的上帝、永遠佇啲的父、和平的人君」。7 伊的國政及平安欲加添無窮盡。就是佇大衛的寶座及伊的國，欲用審判公義來建立伊保護伊，對今到永遠。萬軍的耶和華的熱心欲成此個事。

共同經課 - 2

詩篇九十六篇

1 恁著向耶和華唱新的歌！全地攏著向耶和華唱歌！2 著向耶和華唱歌，祝謝伊的名！日日傳報伊的救恩！3 佇列邦的中間講起伊的榮光！佇萬百姓的中間講起伊奇妙的所做！4 因為耶和華做大，應該受極大的謳嘍；伊佇眾神明的頂面，應該受敬畏。5 因為列邦的上帝攏是虛假；獨獨耶和華創造諸個天。6 佇伊的面前有尊貴及威嚴；佇伊的聖所有權能及榮光。7 百姓中的逐族啊，恁著將權能榮光，歸互耶和華，歸互耶和華！8 用伊的名所應該得著的榮光歸互耶和華，帶禮物來入伊的院。9 著用聖潔的妝飾敬拜耶和華；全地佇伊的面前愕愕！10 佇列邦中著講：耶和華做王！世界堅固，袂搖動；伊欲照公平審判萬百姓。11 願天歡喜，地快樂！願海及其中所充滿的攏出大聲！12 願田園及其中所有的攏快樂！彼時，樹林內的樹木攏欲佇耶和華的面前出歡喜的聲。13 因為伊來啦，伊來欲審判全地。伊欲照公義審判世界，照伊的信實審判萬百姓。

共同經課 - 3

提多書二章十一節~十四節

11 因為上帝救眾人的恩已經顯明，12 警戒咱著棄揀不虔及此世間的私慾，用守己、公義、敬虔來過日佇此世代，13 欣慕彼個大福氣的向望，及咱至大的上帝及救主耶穌基督榮光的顯現。14 伊為著咱獻家己，欲贖咱脫離一切的不法，閣為著本身洗清咱，做伊家己的百姓，就是熱心佇諸個好所行的。

共同經課 - 4

路加福音二章一節~二十節

1 當彼時，該撒亞古士督有出詔，命令天下攏造家甲。2 這頭一攏的家甲，是居里扭做敘利亞總督的時來做的。3 眾人去造家甲，逐人倒去本城。4 約瑟的世系屬佇大衛的家，所以對加利利的拿撒勒城上去猶太，到大衛的城，名叫伯利恆的，5 欲及伊所聘定的馬利亞相及造家甲。彼時馬利亞已經有娠孕。6 In佇遐的時生產的期到，7 就生頭上子，用布包伊，互伊暍佇槽裡，因為客館無所在通容允In。8 彼地方有顧羊的住佇山裡，暝時守更顧In的羊群。9 主的天使倚佇In的身邊，主的榮光圍攏照In；顧羊的大驚。10 天使給In講：「莫得驚！因為我報恁大歡喜的好消息，互百姓攏有份；11 因為今仔日佇大衛的城，已經為著恁生一個拯救者，就是主基督。12 恁欲看見一個嬰仔，用布包，暍佇槽裡的，此個就是互恁做記號。」13 忽然，有多多天兵及彼個天使相及佇啲謳嘍上帝講：14 佇極高的位榮光歸佇上帝！地上和平佇伊所歡喜的人的中間！15 諸個天使離開In，上天的時，顧羊的相及講：「今咱來去伯利恆，看所成的事，就是主所報咱知的。」16 就緊緊去，尋著馬利亞及約瑟，閣看見嬰仔暍佇槽裡；17 看了，就將天使所對In講此個嬰仔的事報人知。18 聽見的人攏奇怪顧羊的所對In講的事。19 獨獨馬利亞將諸個話記住住，心內常常啲想。20 顧羊的倒去，為著所聽見的所看見的，就是天使所對In講的，來歸榮光謳嘍上帝。